



Copia in hoc volumine complenda
 Briefwechsel v. Carolo V. Bischof v. 82. M. A. V. 10. 11.
 Briefwechsel Friedrichs Elisabeth Nach. 28. M. A. V. 10. 11.
 Briefwechsel v. Wolfgang In Bischof. M. A. V. 10. 39.
 Curiosa Gratulationis in natali Joh. Georgij P. A.
 Briefwechsel v. Johann Georg M. A. V.
 Briefwechsel v. Franz von In Bischof. M. A. V. 10.
 Briefwechsel v. Christian In Bischof. M. A. V.
 Briefwechsel Eva M. Cl. S. S. S. S. M. A. V. 10. 3.
 Briefwechsel Maria & Susanna. M. Wolf. A. T. Tim. 2.
 Briefwechsel Friedrichs Anna Sophia M. Wolf. Brandenb. 10. 11.
 Briefwechsel Herzogin Augusta. D. Nicola. S. S. S. S.
 Briefwechsel Johann Gustav. M. Wolf. Brandenb. Sep. 4.
 Briefwechsel D. Prorok. M. Wolf. Brandenb. Apr. 2.
 Briefwechsel v. Analia Juliana M. Wolf. Brandenb.
 Briefwechsel D. Maria von Lamb. Johannes Philippus Maylay.
 Briefwechsel Jacobus Cohen D.
 Briefwechsel von In Bischof. Georg Melchior D.
 von Brandenburg Georg Melchior D.
 Briefwechsel Lisa Crumator. Georg. M.
 Schwarz oder anst. anst. ein. Briefwechsel P. Tiber. Hoffmann.
 Briefwechsel v. Hans Stagnell. M. Chem. S. S. S. S.
 von Georg Lorenz G. Melchior.
 von In Bischof G. Melchior.
 von G. Georg anst. ein. G. Melchior.
 Briefwechsel In Bischof G. Melchior.

Nee 11



Leichpredigt

24
Bey dem Begrebnis des Gestrengen
vnd Ehrnuesten Junckern Hans Sta-
pels / Erbsessen zu Likow
seligen. w.

Geschehen zu Zerbst in S. Bar-
telmes Kirchen / Sonnabents / den
XXIII. Decembris /
Anno 1570.

Durch

M. Clementem Stresonem
Prediger daselbst.



Witteberg. Gedruckt durch
Lorentz Schwencck.

1571.

Albertus Bünzke
pauca schreiffen
von Anno 1570
niscino. 14. Mar

121

[Faint, illegible handwritten text]



Den Edelen/ Er-

barn vnd vieltugentsamen Frauen
Catharina Gölers/ des Bestrengen vnd Ehrn
vesten Junckern Hans Stapels / weiland
Erbessen zu Likow/ seligen/ vnd Margaretha
Stapels/ Juncker Heinrich Wisicken nachge-
lassenen Widwen/ vnd Anna Stapels/ des
Bestrengen vnd Ehrnuesten Joachim
Gölers Ehliche Haus-
fraw / etc.



Nad vnd Fried/ sampt einem se-
ligen vnd frölichen newen Jahr
durch Christum. Edele/ Erba-
re/ vnd vieltugentsame Frauen/
der heilige Prophet vnd Man
Gottes Job/ im 19. Capitel seines Buchs / da
er in seiner Kranckheit vnd höchsten schmer-
zen / voller Schweren im staub sizet / vnd nu
von Gott nichts mehr begeret / denn einen seli-
gen abscheid aus diesem jamerthal vnd betrüb-
ten leben/ thut er gar ein herrlich vnd tröstlich
bekentnis seines Glaubens/ worauff er in sei-
ner Not vnd schmerzen trawe/ wie / vnd wor-
auff er gedencke zu beharren / vnd sein leben zu
A ij beschlies-

beschliessen / Nemlich / vff das leben seines Er-
lösers Ihesu Christi / das der in am Jüngsten
tage werde wider aufferwecken / mit Leib vnd
Seele zu sich nemen / damit er in mit frölichkeit
anblick wider anschawen im ewigen Leben.

Vff das aber auch solch sein bekentnis
vnd trost nicht heimlich bleibe / wünschet er
von herzen / das es auffgeschrieben / in ein
Buch gestellet / mit eisern Griffen in Bley / in
einen Marmel' gehawen / vnd mit Bley aus-
gossen werde / zum ewigen gedechtnis / vnd an-
dern Leuten zu trost vnd sterckung ihres Glau-
bens / vnd zuuersicht auff Christum / vnsern
Ewigen vnd Einigen Erlöser / on welchen nie-
mand Gott gesehen / noch sehen / oder selig
werden wird / Sintemal er allein zum trost
vnd Heil den Menschen von Gott geordnet
ist / wie Esaias sagt im 49. Cap.

Daraus ist ie gewis / das aller Glaub-
igen höchster Trost vff Erden allein in Christo
Ihesu stehet : Denn weil wir ja alle umb der
Sünden willen / aus diesem leben / durch den
Tod wandern / vnd vnser Leib zu staub vnd
aschen werden müssen / nach dem fluch Got-
tes / Welchs tages du wirst vbertretten / soltu
des

des Todes sein/ vnd solt wider zur Erden werden/etc. Das dennoch vnser Erlöser Christus Ihesus lebe/ der vns hie von Sünden erlöset/ vnd durch seinen Tod / vom ewigen sterben errettet / vnser Leib nicht ewig in der Erden lassen werde / Sondern am Jüngsten tage/ mit Leib vnd Seele / haut vnd har / augen vnd ohren / wie wirs hie in diesem Leben gehabt / wider aufferwecken wird zum ewigen Leben / auff das ein jeder fur sich / mit seinen augen / in ewiger Herrlichkeit Gott anschawe / von angesicht zu angesicht / wie er hie Christum / als seinen Erlöser erkandt / gegleubet / vnd bis an sein ende bekant hat. Denn wer da beharret bis ans ende / sol selig werden.

Diesen Christum hat auch der Gestrenge vnd Ehrnueste Hans Stapel / ewer herzlich lieber Hauswirt / vnd Bruder seliger / als auch seinen Erlöser / in seinem Creutz erkant / vnd an im fest / bis an sein ende gegleubet / vnd darauff seliglich / durch Gottes gnade entschlaffen / wie in der Leichpredigt gemeldet / ir auch alles selbs gehöret vnd gesehen / ja in diesen Christum neben mir / selbs geprediget habt.

Denn ich mus ja bekennen / das sun-
A iij derlich

Derlich in der Mittwoch nacht / für seinem ende /
als im ein hefftiger vnd engstlicher Durst an-
kam / nach frischem Wasser / ir in nicht allein
ausredet das Wasser / sondern auch zum rech-
ten wasser des Lebens / den **HERRN** Chri-
stum / vnd zum lieben Gebet / trewlich ermun-
tert vnd vermanetet. Darin er auch trew-
lich folgete / vnd als eine arme Hinde / durch die
ganze nacht gejagt vnd geengstiget / nach dem
frischen vnd warhafftigen lebendigen Brun
alles trostes vnd erquickung / Christum Jhe-
sum / echzste vnd lechste / in auch mit ernster an-
ruffung / als mit dem allernötigsten / in dieser
Not suchte / bis so lang sein mund redet.

Drumb freilich kein zweiucl / sein Er-
löser Christus / werde in auch gewis aus der
Erden / zu seiner zeit / wider aufferwecken / auff
das er mit Tob / vnd allen Heiligen / ja mit sei-
nen augen / vnd für sich selbs / Gott wider
schawen (in ewiger gemeinschaft Gottes / der
heiligen Dreifaltigkeit) vnd zwar ir selber /
ewren lieben Man vnd Bruder / wider sehen
möget / Wie der liebe David sich seines lie-
ben verstorbenen Sönlins / mit der Barsaba
gezeuget / tröstet / da er sagt : Er wird wol nicht
wider hie her komen / Aber ich werde zu im ko-
men / 1. Samuel. 12. D Je.

DZerweil denn dieses gezeugnisses vnd
Predigt jr euch getröstet / wie ich vernomen/
vnd derhalben begeret / dieselbige in den Druck
zuuerfertigen / zum ewigen gedechtnis / der
grossen Gnade vnd Barmhertzigkeit Gottes/
an ewrem lieben Juncker vnd Bruder seligen /
bewiesen / vnd seines endlichen trostes / so er
nicht auff Adel / gewalt / reichthumb vñ pracht /
in seiner Not gebawet / Sondern auff seinen
Erlöser Ihesum Christum / bin ich euch hirin /
wie billich / wilfertig gewesen / ob vielleicht euch
vnd anderen mehr / mit dieser einfalt möchte
gedienet sein / das ich von herzen wunsche.

DENN ob wol ich diese meine Predigt /
nur vffs gegenwertige Volck gerichtet / vnd
nicht gemeint / das man sie von mir fordern
würde / So wolte ich doch nicht gerne / vnd sol
auch nicht angesehen werden / als schewete ich
des Liechtes / vnd dürffte nicht gestehen / das
ich ein mal an diesem ort meines Beruffs / of-
fentlich gezeuget vnd gepredigt hette. Sun-
derlich weil diese meine Predigt / niemand zum
nachteil / allen aber / vnd jeden zu trost gerei-
chet / vnd zur warnung / für Gottes zorn vnd
künfftiger straffe / ober die bosheit / Geiz / Hof-
fart / vnd andern Sünden mehr / der jzigen bö-
sen

sen vnd vbertauffelten Weltkinder / ob etliche
daraus sich bessern / vnd zur Busse beferen
wolten / vnd also / da sie ja im zeitlichen vnglück
vnd trübsal / müsten mit auffgehen / dennoch
dem ewigen Jamer vnd Tod empfliehen möch-
ten / auff den trost des Propheten Esaie / das
Gott wol ein rechter Richter sey / vnd Sünde
vnstlich straffen wil / wo er sie findet.

Aber dennoch daneben Gerechtigkeit /
das ist / vergebung der Sünden / vnd ewiges
Leben / predigen vnd anbieten lesset / vmb Chri-
sti willen / allen die es hören / glauben / vnd dar-
auff bestendiglich verharren / Wie Psalm. 89.
geschrieben stehet: Ich wil ire Sünde mit der
Ruten heimsuchen / vnd ire Missethat mit pla-
gen / Aber meine Gnade wil ich nicht von ir
wenden / vnd meine Wahrheit nicht lassen seilen.

Der Allmechtige Gott vnd Vater vn-
seres HERRN Ihesu Christi / wolle euch
samt den andern betrübtten Freunden / mit
gnedigem Trost / vmb seines lieben Sons / wil-
len beistehen / vnd den erlittenen schaden / wo
nicht in diesem / doch in jenem Leben / reichlich
an Leib vnd Seel erfahren / das jr euch mit frö-
lichen anblick widerumb sehen müget / Gott
zum

or/Anm

zum ewigen lob vnd danck / durch Christum
vnsern Erlöser vnd Seligmacher / Amen.
Datum Herbst / am newen Jars tage
des anfangenden 1571.



E. williger Diener

in Gottes wort

M. Clemens Streso
Seruestensis.



B Esate

Esaiē 5.

WEh denen / die ein Haus
an das ander zihen / vnd einen
acker zum andern bringen / bis
das kein raum mehr da sey / das
sie allein das Land besitzen. Es
ist für den ohre des HERRN
Zebaoth / Was giltts / wo nicht die viel Heuser
sollen wüste werden / vnd die grossen vnd fei-
nen / öde stehen? Denn zehen acker Weinber-
ges sollen nur einen Eimer geben / vnd ein
Malder samē sol nur einen scheffel geben.

W^EH denen die des morgens früe auff
sind / des sauffens sich zu vleissigen / vnd sitzen
bis in die nacht / das sie der Wein erhitzt. Vnd
haben Harffen / Psalter / Paucken / Pfeiffen
vnd wein in irem wolleben / Vnd sehen nicht
auff das werck des HERRN / vnd schaw-
en nicht auff das geschafft seiner Hende.
Darumb wird mein Volck müssen weggeführt
werden vnuersehens / vnd werden seine Herr-
lichen hunger leiden / vnd sein Pöbel durst lei-
den. Daher hat die Helle die seele weit auffge-
sperret / vnd den Rachen auffgethan on alle
masse /

masse / Das hinunter faren beide die Herrli-
chen vnd Pöbel / beide ire Reichen vnd Fröli-
chen / Das jederman sich bücken müsse / vnd je-
derman gedemütiget werde / vnd die augen der
Hoffertigen gedemütiget werden. Aber der
HERR Zebaoth erhöhet werde im Recht /
vnd Gott der Heilige geheiligt werde in ge-
rechtigkeit.



Terweil wir bey dieser Leich zusa-
men komen / nicht allein darumb / das wir
dieselbe Christlich vnd Ehrlich zur Erde
bestetigen / vnd mitleiden mit einander
tragen / wie wir schuldig sein nach dem
Befehl des Apostels Pauli Roma. 12. Weinet / mit den
weinenden : Sondern furnemlich darumb / das wir vn-
ser grosses Elend vnd jamer behersigen / wie es doch
kome / das wir alle mit einander / gros vnd klein / jung
vnd alt / Edel vnd vnedel / starcke vnd schwache / des
Todes bitterkeit schmecken müssen / vnd warumb doch
offt viel frome starcke Helden dahin fallen / ehe sie die
helffte des lebens irer Väter erreichen / vnd was wir
vns in solchen fellen zu trösten haben.

Demnach wollen wir diesen Text aus dem
Propheten Esaia fürnemen vnd handeln / nicht der
meinung / das wir an den verstorbenē vnser lust büßen /
vnd jm / als einen Sünder Gottes / der durch Göttliche
Gnade / in rechtschaffne Busfertigkeit gebracht / vnd
bekeret worden / Sünde vnd schande nachpredigen wol-
ten / wider das gemeine Sprichwort : De absentibus &
B ij mortuis

*Cū in hunc
horis p*

mortuis nil nisi bonum. Der abwesenden vnd Todten/
sol man im besten gedencen.

Vnd sunderlich weil er / gleich wie der letzte in
seinem Geschlechte gewesen / Also sich auch mit vns gar
Christlich vnd wol gelehret vnd beschlossen hat / vnd nu
mehr an der Warheit / vnd ewigen Liecht ist / wie wir
hoffen / wir aber noch in finsternis der lügenhafften
Welt umbwallen / vnd alles des vnser jeder mus gewer-
tig sein / das wir an andern sehen. Sondern das wir
vnserer / wie gesagt / Menschlichen schwachheit vnd sterb-
lichkeit / vnd des grossen jamers erinnert werden / vnd
warumb doch iho der Teuffel / am ende der Welt / die
Leute so gar erschrecklichen einnimpt / mit Geiz / Stoltz
vnd Hoffart / fressen vnd sauffen / vñ verachtung Gött-
licher werck vnd Geboten / vnd mit andern dergleichen
mehr Sünden / welche der Prophet in diesem Capitel
nennet / vnd darüber gar hefftig klaget / mit vermeldung
der straffen Gottes / vff das wir in deren betrachtung /
vmb gnade vnd hülffe / wider den Teuffel zu Gott ruf-
fen vnd seuffzen / vnd also durch seine Göttliche Gnas-
de / in rechtschaffene Busfertigkeit vnd erkentnis vns-
erer Sünden / geleitet / den grossen straffen Gottes / bey
zeit zuorkomen seines Berichtes vnd Gerechtigkeit /
wie der Prophet sagt / vns trösten / vnd bitten / das wir
durch Christum / für dem ewigen jamer vnd zorn Got-
tes / behütet werden / Roma. 5. vnd darauff Gottes
willen / so viel möglich / leisten / in heiligkeit vnd gerech-
tigkeit die jm gefellig ist / Luc. 1.

Den ob wol Gott einen geizigen vnd stolken
Schnarcher / Fresser vnd Seuffer / einen Buben nach
dem

dem andern einzelen / durchs Schwert oder Galgen/
Rad/Fewr/oder sonsten durch den schweren vnd plöz-
lichen tod/demütiget vñ wegreumet / so ist doch darumb
der leidige böse Teuffel noch nicht gestorben / der die
Leute mit allerley Sünden treibet vnd plaget / sondern
je neher das ende der Welt heran eilet / desto rasender
sich der Sathan in den Weltkindern sehen leßt / vnd sie
one ansehen der personen Adels vnd vermögens / wie
die Jaghunde an der Koppel hinder sich her / zur Hel-
len zu schleppet / Denn er weis das er wenig zeit hat
Apocal. 12.

Solchen allen furzukomen/wollen wir erstlich-
en hören was der Prophet fur Sünde erzelet / dadurch
sich die Welt vnter Gottes zorn / in allen Jamer vnd
endlich in den Tode hinein füret.

Ihm andern weil Gott gerecht ist/vnd unwan-
delbar / das solcher sein gerechter zorn vber alle Gott-
losen zu jeden Zeiten ergangen / vnd noch ergehe/zeit-
lich vnd ewiglich.

Und zum dritten / was sich die busfertigen in
der zeitlichen straffe vnd Todtes noth/ mit diesem verz-
storbenen Poenitenten vnd Merterer Ihesu Christi/
so fern sie seinem Exempel folgē/auch zu trösten haben.

Das erste stücke.

Ihm ersten / hebt der Prophet dieses Capit-
tel an mit erzehlung der wolthaten / so sein lieber zus-
künfftiger Heiland Messias / vnd nach dem fleisch
sein angeborner Blutsfreund / vnd Better Christus
Ihesus/

B iij

Ihesus/

Ihesus/dem Menschlichen geschlecht vnd den Jüden
damals sunderlich erzeiget hat / in dem er einen Weins-
berg vnter jnen gebawet / an einem fetten Ort / densel-
ben hacket vnd rodet/vnd voller köstlichen Weinreben
pflanket/das sie gute Frücht bringen / vnd er derselben
geniessen möge.

Vnd vmb der zukünfftigen fruchte willen/spricht
der Prophet/vombgrebet er in / vnd macht einen Zaun
drumb her/bawet einen Thurm darinne/ vnd setzet dar
auff Hüter vnd Wechter/ Das ist/ Gott samlet jm nicht
allein auff Erden/aus den Menschen/zu allen zeiten/ei-
ne Christliche Kirche/in der krafft vnd stercke seines lie-
ben Sons Ihesu Christi / aus lauter gnade vnd güte /
Wie er denn selbs auch eben dieser wort / des Prophe-
ten in beschreibung der Christlichen Kirchen / Matth.
21. gebrauchet: Sondern pflegt / wartet / vnd belegt
dieselbige mit dem besten Holz vnd Geweche / Nemli-
chen/mit seinem heiligen Euangelio / verwaret densel-
ben mit Reunen vnd Thürmen/das ist/verordnet Gott
selige/Christliche/vnd friedsame Schutzherrn vnd Ds-
berkeit/ Schicket darneben aus Hüter vnd Wechter/
frome getrewe Lerer/ Propheten/Aposteln / Doctores/
Pfarherrn / Prediger vnd Seelsorger / die drin arbei-
ten/wachen/ruffen/vnd warnen fur falscher Lere / für
Sünden vnd für straffen Gottes.

Wendet auch weiter allen müglichen vleis / mü-
he/arbeit/vnd vnkosten / an diesem allerliebsten Weins-
berg/wie er sagt: Quid ultra debui facere, quod non
feci? Was sol ich nur mehr thun/das ich nichtgethan
habe / vff das er ja vnser mit freuden / hie vnd in ewig-
keit

keit geniessen / seine lust vnd ergekung an vns haben möchte.

Wer wie halten wir vns dargegen? Ach leider/ Gott im Himmel erbarmts / also / das der Prophet weh vnd zeter darüber schreiet.

Den da wir solten gute fruchtbare Reben sein/ werden wir der mehrer teil/gar zu wilden Labruscis vnd Heerlingen/das ist / wie es der Prophet selbs erkleret/ Geizige / Trostige / Hoffertige Schnarcher / Fresser vnd Seuffer / die Gottes werck nicht achten / vnd vff seine Gebot gar nichts /oder ja wenig geben.

Den gleich wie es zu des Propheten zeiten vnd der zukunfft des HERRN Christi geschach/ da sie hetzen sollen vff das Wort vnd verheissung Gottes auffmercken/Christum darinne vnd die verheissene Himlische guter suchen/verachteten vnd lesterten sie der Propheten rede/verseumeten Christum/ wurden sicher vnd rüchlos / vnd befließen sich dargegen des keuffens vnd verkeuffens / vnd wie sie viele Heuser vnd Ecker zusammen brechten / das Land alleine zu sich rissen / frassen vnd sofften/ Wie denn Luce 14. sich die geladenen Hochzeit Beste des HERRN Christi/dessenthalben entschuldigen/das sie nicht komen können / das der eine Acker/ der ander Ochsen/der dritte ein Weib genommen hatte/ etc.

Also lest jr die Welt noch heutiges tages die zeitliche / kurze vnd vergengliche wollust/ Gelt / Gut vnd Hoffart mehr angelegen sein/denn Gottes werck / das heilige Euangelium/vnd die ewige seligkeit.

DArumb

Drumb strafft der Prophet allhie erstlich den
heilosen Geiz/in hohen vnd nidrigen Stenden. Denn
vnerhorte schagung vnd stewr bey Fürsten / Herrn vnd
Weltlicher Oberkeit / werden vbermacht / on alle maß
vnd einige Barmhertzigkeit/vnangesehen/wie die Un-
terthanen mit Lerer vnd Prediger versehen sein / vnd
wie Gericht vnd Gerechtigkeit / schutz vnd schirm im
Lande administrirt werden.

DJe Junckern vnd Edelleute auffm Lande/ ent-
wenden nicht alleine jren Unterthanen / mit list vnd
gewalt / Ecker / Wiesen/ Holzung / verbawen/vorteis-
chen vnd vorseuffen jnen alle nötige Trifften vnd we-
ge / mutwillig / vnd beschweren sie darüber gleichwol
mit vnerhorten / vierfachtigen Frönen vnd Hoffdiens-
ten/ Sondern reissen auch vom Altar/nemen den Kir-
chen jre Ecker/Güter vnd Almosen/vnd was mehr von
jren fromen Voreltern / guter meinung dem HErrn
Christo / vnd seiner Kirchen gegeben / vnd gestiftet
worden ist / vnd treiben damit wucher / vnd allerley
schreplerey vnd vnadliche handtierung / mit verderben
jrer Unterthanen/vnd mercklichen schaden / der lieben
Kirchen vnd Hauses Gottes.

Vnd wie die Herrn vnd Junckern vorgehen/
also folget Herromnis nach/wuchert vnd sauget einer
den andern selbs aus/bis auff den Grad/betriegem vnd
verforteilen einander / wie sie nur können vnd vermö-
gen/mit recht vnd vnrecht / mit Ehren vnd vnehren/
jnen zu nutz / vnd andern zum nachteil vnd schaden.
Vnd in summa/manchen treibet der Geisteuffel / das
er Gelt nimpt/vnd dienet dem Teuffel / Türcken oder
Musco

Muscowiter / Papisten oder Jesuwiter / gilt im alles
gleich / Als denn nu mehr vnser Deudsche Kriegshel-
den den rhum haben / das man sie mit roten Gilden lo-
cken kan / wie die Meisen mit einer Nus / vnangesehen
was Gott / Ehre vnd gut Gewissen / darzu sagen.

Da mus niemand wider reden / so hilfft auch bey
inen kein vermanen / noch dremen Göttliches zorns /
Sondern wie sie es fürnemen / also mus es gehen / on
alle einrede / des vnd kein anders nicht.

Vnd wie sie es begeren / so machts inen auch
Gott / schicket inen zu / stumme Hunde vnd faule / schlef-
ferige / versoffene Wechter / die weder sehen / hören noch
reden müssen / bis Gott die Herrn / Junckern / Thürm /
Hüter vnd alles ober einen hauffen stürzet vnd umb-
keret.

Die ander Sünde ist Ebrietas, das vngewre
Teuflisch fressen vnd sauffen. Denn wie Geiz eine
Wurzel alles bösen / auch von den Heiden genent ist
worden / Also wechset aus dieser schedlichen Wurzel
imer eine vntugend / Sünde vnd schande nach der an-
der. Da siset denn Juncker Epicurus, vnd sagt lauter
Pax & securitas, Wie an dem reichen Banst Luce 12.
zu sehen ist. Denn da derselbige seine Schewren alle
voll gesamlet hatte / war es im nur umb fressen vnd
sauffen / umb einen guten mut / vnd zeitliche wollust zu
thun.

Also regirt jzt leider vber all die secura Ebrietas,
Die Leute sind sicher / ruchlos / fressen / sauffen vnd ban-
cketiren one maß / vnd vnseglich / mit grewlichen vnd er-
schrecklichen mißbrauch der lieben Creaturen Gottes /
E Weins

Weins vnd Biers / Musick / Lauten / Harffen / vnd
Pfeiffen / von einem tag vnd nacht zur andern / vnd ge-
ben andern Leuten grosse ergernissen / sich selbs fressen
vnd sauffen sie arm / krank vnd in die Helle / Wie hiez
mit vnser lieber Herr vnd Præceptor Philippus Mes-
lanthon / die Jugend pflage zu straffen.

Vnd dieses laster ist numehr so gebreuchlich
vnd gemein / sunderlich an Fürsten Höfen / vnd in den
grossen Junckern Gelagen / das es für keine Sünde
mehr / ja für grosse Adelige ehre vnd tugend geacht
wird / Summa / der ist kein rechter Edelman / der nicht
fressen vnd sauffen kan.

Darumb hat auch Juncker Mordebier / der viel
Bier schlucken / vnd den andern krank vnd zu tod sauff-
en kan / den grösten rhum / ist der beste / vnd verdienet
sein Gelt vnd besoldung damit / Gott gebe was der
Pfaff singe oder sage / Ja wil er gute tage haben / mus
er mit heuten / mit sauffen / vnten vnd oben mit ligen /
Juncker vnd Pfaff sein / wie es fellt.

Es gewinnet aber auch ein ende / wie mit jenem
Heuchler / vnd Rauffman / der an seinem Todtbette / sei-
ne Seele dem Teuffel vnd Helligischen Geistern vortez
stiret vnd bescheiden hatte / vnd darnach zu seinem Prie-
ster gesagt : Juncker Pfaff / jr solt auch bey mir sein /
vnd mit mir das Brod der ewigen Trübsal essen / im
abgrund der Hellen. Denn jr habt mein vnchristlich
leben angesehen / vnd mich nicht darumb gestrafft / aus
furcht / ich möchte euch von meinem Tisch stossen. Dar-
umb nur mit mir fort / jr solt es nicht besser haben als
ich /

ich / Da wird denn der Teuffel Abt / vnd singet selbs /
beide Pfaffen vnd Junckern die Seelmessen nach / mit
allen freuden.

Solche Leute heisset der Prophet / Helden zu
sauffen / vnd Krieger in der füllerey / als wolt er sagen :
Junge Fürsten / Herrn vnd Junckern / solten sich aller
Fürstlichen vnd Adelichen tugenden befleissigen / in
kempffen / fechten vnd Turniren / sich üben / damit sie
im streit vnd Kriegen / wider die Feinde / jr Vaterland /
das arme zerrissene Germaniam / Ritterlichen verfechte
ten / vnd schützen möchten / Aber sie befleissigen sich
mehr teils / leider Gott geklagt / der grossen Kühesüf-
fe / vnd wie sie grosse Thülen vnd Becher stürzen /
Gleichsam kündte man damit den Erbfeind der Chris-
tenheit / schlagen vnd stewarten.

Darumb lauffen sie auch weidlich an / werden
vber die Köpffe geschlagen / komen mit leerem Beutel
vnd frischen Wunden wider heim / vnd jagen den Tür-
cken je lenger je neher hinder sich her / bis so lang sie in
der mal eins gar herein führen / vnser liebes Vaterland
zu verwüsten / dafür vns Gott gnediglich behüten wol-
le.

Die dritte Sünde / ist Stolz / Hoffart vnd
Pracht / da wil keiner dem andern zuuor geben / sondern
ein jeder wil / wie das alte Liedlein lautet / Dne maß
vnd ziel / sich kleiden vber gebüre / rein treten vber quir-
re.

So gar vbermachts ikund die Welt / vnd sons-
derlich die vom Adel / mit Sammet / Seiden / Perlen /
Gülden vnd Silbern Geschmeide / vnd Kleinodien /
Schmincken / Bremen / schwencken / krausen vnd pau-
sen /

sen/wie der Prophet im 2. Capitel klaget/ das nu mehr
kein vnterscheid zu sehen ist/zwischen Fürsten/Grafen/
Edelleuten/ Bürgern vnd Stenden.

Nyrauff folget darnach trocken / schnarchen vnd
pochen / Vnd je gewaltiger / reicher / mechtiger vnd
Edler einer ist / je mehr er darauff troket / vnd den an-
dern auff freier strassen/in Stedten vnd Dörffern an-
schnaubet / anschnarchet / rechtfertiget / mordet vnd
würget. Vnd können nu mehr viel Junckern wider
die Bürger vnd arme Bawren/nichts denn Schwerd-
ter / Büchsen vnd Schweinspieße / aus Maul vnd
Nasen schnauben/ wie die schaubenden vnd leibhafftis-
gen Teuffel selbs / nach dem gemeinen Sprichwort:
Homo homini Diabolus. Ein Mensch solte des andern
Gott sein/ so werden sie zu Wolffen vnd Beeren/ ja zu
Teuffeln / Gott erbarmis.

Vnd in summa/ sie sehen nicht/spricht der Pro-
phet/auff das Volck des HERRN/vnd schawen nicht
auff das geschefte seiner Hende. Item / bald hernach:
Sie verachten das Gesetz des HERRN Sebaoth/
vnd lestern die rede des heiligen in Israel.

Dyses ist der Brunquell vnd vrsprunck der vo-
rigen vnd aller andern Sünden / das schier niemand
Gottes wort / Euangelium vnd Gebot mehr achtet/
niemand wils mehr hören / oder hört es auch nur zur
lust/vñ fur die lange weile. Jederman lestert vnd schen-
det den HERRN Christum/ vnd seine Diener/verseumet
vnd verhindert Kirchen vnd Schulen. Alle wollen der
Kirchen geniessen/reissen derhalben zu sich / was jr ge-
büret/

büret / vnd mit allem Recht zugehöret / bawen grosse
Schlöffer vnd Heuser damit / verprassen verschwenden
vnd verkleiden alles / Aber das Haus Gottes / spricht
Aggeus / lassen sie wüste stehen / als hetten sie nichts
darinne zu schaffen. Vnd in summa / sie wollen leben
vnd thun / wie / vnd was sie gelüftet / keinen zwang vnd
einrede leiden / lestern ehe drüber die rede vnd straffe /
des Heiligen in Israel / ja Gott im Himmel selbs. Dar-
umb die Welt freilich nichts anders ist / denn wie Lu-
therus gesagt hat / Ein stall voll Gottloser / Epicurischer
Buben / Schnarcher vnd Verechter Gottes / vnd sei-
nes Euangelij.

Dieses sind zum ersten die Sünde / damit
die Weltkinder allerley trübsal vnd jamer / vnd den
Tod verursachen / das ehe ire zeit kompt / durch Gottes
zorn sie ausgerottet werden. Denn vmb der Sünden
willen / straffest du der Menschen Kinder / spricht David /
vnd Gottes zorn wird offenbar von Himmel herab / vber
alles Gottloses wesen / etc. Eben wie der Prophet E-
saias in diesem Capitel spricht : Darumb ist der Zorn
des HERRN ergrimmet vber sein Volck / vnd recket
seine Hand vber sie / vnd schlegt sie / wie dauon im an-
dern stück folget.

Das ander stücke.

Zum andern / möchte manches fromes
Herz / das in die Welt hinein sihet / vnd dieser vnd
mehr Sünden gewar wird / fragen / Ob denn
gleichwol Gott solchen mutwillen jmer werde zuse-
hen ?

*Im 1. Buch
der Könige*

Da sagt der Prophet lauter nein zu. Denn /
spricht er / es ist für den Ohren des HERRN Ses-
baoth / was gilt / wo es wird vngestraftet bleiben? Als
wolt er sagen: Sie meinen wol / die arme blinde vnd
taube Leute / weil sichs so lange verzeucht / es werde nicht
not haben / Gott habe weder Augen noch Ohren / sehe
vnd höre nicht iren mutwillen / vnd sey niemand vber
sie / Psalm. 95. Aber warlich Gott hat leise Ohren /
vnd vindicem oculum, ein zorniges vnd rachgiriges
Auge / Denn solte dernicht hören vnd sehen / der das
Ohre vnd das Auge geschaffen hat? Psal. 95.

Wie aber Gott gewis Sünde straffet / also helt er
auch seine Ordnung so gewis / das er nicht allein eben
dadurch straffen / daran man sich versündigt / Son-
dern auch vt tarditatem recompenset grauitate supplicij,
das ist / wenn er langsam kompt / so viel deste ernstli-
cher vnd grausamer sich erzeiget / wie im Propheten hie
zu sehen ist.

Denn erstlich spricht er: Wehe den Geizigen /
ire Heuser sollen wüste werden / vnd die grossen vnd
die feinen öde stehen / Vnd zehen Acker Weinberges /
sollen nur einen Eimer geben / vnd ein Malder samens /
nur einen Scheffel.

Diese verwüstung vnd miswachs / hat Gott
ja nicht allein redlich vber sein Volck vmb ires geizes
willen / gehen lassen / wie die Historien zeugen / sondern
hat auch vns recht getroffen.

Denn die Pestilenz ist vns ja fast allen durch
die Heuser gangen / so ist vns der hunger auch in die
hende

hende kometen/vnd sind hin vnd wider / die Land durch
Kriege verwüestet/vnd die Leute beraubet worden.

SD ist etliche Jar nach einander / grosser miß-
wachs fürgefallen / vnd drewet Gott noch mehr vnd
grössere / Wie denn der Prophet in den vorgehenden
ersten Capiteln sezt: Et adhuc manus eius extensa est,
vnd wir schmerzlich sehen an denen successibus der
Türcken/Muscowiter/Bapst vnd andern Feinden.

SD hören wir auch gewis/an allen orten ganz
hes Deuschlandes / innerliche Kumores vnd Kriege
daher rauschen / das zu besorgen / Bruder Beit vnd
Gottes fluch / werde verwüsten vnd wegreißen / alles
was wir zusamen gezeiget haben/ Wie Gott durch den
Propheten Amos drewet / Ir wartet auff viel/vnd sihe
es wird wenig / Vnd ob irs schon heim bringet / so zer-
steube ichs doch. Item Esaias spricht: Ir habt armen
Leuten ire Prædia, Ecker vnd Vorwerck / genomen /
darumb wil ich den Fluch senden/vber ewer Ecker vnd
Weinberge. Item Cap. 33. Væ qui spoliast? Weh
dir/ der du raubest/du solt wider beraubet werden.

Um andern / spricht er / Weh denen / die des
morgens frühe auff sind/des sauffens sich zu vleissigen/
vnd sitzen bis in die nacht etc. Item/ Weh denen / so
Helden sind Wein zu sauffen/vnd Krieger in Fülleren
etc. Darumb wird mein Volck müssen weggeführt
werden vnuersehens / vnd werden seine Heiligen hun-
ger leiden/vnd sein Pöbel durst leiden. Solchs weh hat
das Jüdische Volck freilich nicht allein in der Babilo-
nischen Gefengnis gefület / dauon inen auch Amos
geprez

gepredigt hat/ Weh euch die jr esset / das beste aus der Herde/ vnd die gemesten Kelber / vnd spielet auff den Psalter/ etc. Darumb sollen sie forn angehen vnter den Gefangenen / vnd sol das schleimmen der Branger auffhören. Sondern aller erst recht in der lezten zerstörung Jerusalem/ da sie am sichersten gewesen/ gefressen vnd gesoffen / vnd gesagt: Pax & securitas, Es hat kein not. Denn da sind sie von dem Tito plözlich vberfallen/ vnd in die 150000. so vber die Mawren heraus geworffen / hungers gestorben / darnach sind in die zermal hundert tausent erwürget / vnd 97000. gefangen weggeführt worden/ Reiche vnd Arme/ Edele vnd Vnedele/ wie Josephus dauon schreibet.

Also haben wirs noch alles für vns. Denn ones das / das wir sehen/ wie teglich viele junge Menner dahin fallen/ die sich zu tode gefressen vnd gesoffen haben/ oder sonsten jemerlich vmb jr leben komen/ wie Alexander Magnus/ im 32. Jahre seines alters auffgeflogen ist/ müssen wir/ des Türckē/ Muscowiters vnd Papsts/ sampt seinen Spanischen Hencker / Meistern vnd Inquisitoribus jmer gewertig sein. Denn ob wol Gott bereit in Vngern / durch den Türcken / viel Christen lest gefangen wegfüren / sebeln vnd würgen / vnd sonderlich jho im Niderland/ durch den Albanischen Teufel grewlich ist gewütet worden/ dazu auch grosser hunger vnd tewrung vorfallen / So behelt jm doch Gott vor / grössere straffen vnd tewrung / welche er drewet durch die vngewönliche vnd vnerhörte Gewisser / so beide hie vnd anderswo / vnd newlich in Friesland/ Holland vnd Seeland/ grossen schaden gethan / grosse Heuser/ Flecken vnd Dörffer/ verseufft vnd weggeführt/
mit

mit Menschen vnd Bihe / das vnter den Leuten / hin
vnd wider gros armut vnd mangel vorleufft / dadurch
jr viel hungers vnd durstes halben verschmachten müs-
sen / Vnd wird gewis nicht besser werden / denn die Leu-
te werden nicht besser.

JA spricht ein reicher Geickhals / Was kans
werden / ich habe wol so viel / das mirs nicht mangeln
kan / wie der Reiche Man in Luca auch sagt: Mein
Haus vnd Hoff vnd Schwren / sind alle voll / es hat
nu nicht not.

Aber hör lieber Gesel / was Gott darzu sagt /
Du Narr / spricht er / du solt nichts geniessen / denn heint
die nacht sol deine Seele von dir genommen werden. Al-
so kan dir Gott alle stunde / wie dem fromen Job / ensis-
hen / was du zusamen gezeiket hast / vnd dich an deinem
Leibe also angreifen / das du weder essen noch trincken /
sondern bey deinem grossen Hauffen / mit schmerzen
vnd bösen Gewissen / verhungern vnd verdürsten must /
Ja des lieben Wassers / sol dir auch zu wenig werden /
wie dem reichen Man Luce 15. dem nicht ein einiges
Tröpflein werden mus / damit er seine Zunge in der Hel-
lischen flamme kühlen möge / auff das er wol büsse / was
er hie zu viel gefressen vnd gesoffen hatte / vnd den ar-
men Lazarum bey sich verhungern lassen.

Im dritten / spricht er / jederman sol sich bü-
cken / vnd die augen der Hoffertigen sollen gedemütiz-
get werden / das ist / Gott wil jren Hohmut / stolz vnd
trutz / stewren / vnd sie redlich deponiren vnd stürzen.
Denn es wird der tag des **HERRN** Sebaoth / spricht
der Prophet im 2. Capitel / gehen vber alles erhabens /

D Das

Das es genidriget werde / das sich bücken müssen alle
Höhe der Menschen / vnd demütigen / was hohe Leute
sind / vnd der HERR allein hoch sey / Vnd sonderlich
drewet er gar erschrecklich / der schendliche Weiber hof-
fart im 3. Capitel / Das sie sollen beraubet / nacket /
arm vnd elend werden / Vnd wie Aggeus auch sagt :
sollen verarmen / vnd wenn sie sich kleiden / werden sie
sich doch nicht wermen / In summa / sie sollen Ignobiles,
vnedel / vnd vngeachtet werden / I. Samuel. 2. Vnd
der Pöbel durchs Schwert fallen / vnd deine Krieger
im streit / Esaie 3. Cap. oder sonsten auffliehen vor der
zeit / vnd ehe sie jr leben zur helffte bringen / erwürget /
erstochen werden / oder jemerlichen sterben / das ire Leiz-
chnam wie Rot auff der Gassen ligen / Als Danielis
im 5. Capitel / der Perser König Belsazer vnuersehens
in der nacht erwürget wird / da er am hoffertigsten Gots-
tes spottet / vnd mit seinen Capitenen / Weibern vnd
Rebweibern / Gott zu trocke / vnd spot der Jüden / sich
voll frisset vnd voll seuffet / aus denen geheiligten Ges-
fessen / so sein Vater Nebucadnezar / aus dem Tempel
zu Jerusalem genommen hatte.

Vnd sollen also feine alte Geschlechter / mit wur-
zel vnd stam außgerottet werden / aller Pracht / Adel /
Schild / Helm vnd Herrligkeit sollen fallen / das weder
stumpff noch stiel vbrig bleibet. Denn wie des Fews-
ers flamme / stroh vnd stoppeln hinnimpt / Also wird
ire Wurzel verfaulen / vnd ire sprossen aufffaren wie
staub / Esaie 5. den der wind zerstreuet / Psal. I. Vnd
sol irer nicht mehr gedacht werden / Psal. IIS. Ja ire
stedte wird nicht mehr funden werden / Psal. 36. Denn
der

Der HERR wird das Haus der Gottlosen austrotten /
Prouerb. 15.

NB gieng es mit diesen zeitlichen straffen noch
hin/vnd möchte vmb dieses leben/Adel/ Ehre vnd Gut
komen wie es köndte/wenn nur Gott dort schonen wol-
te/wie S. Augustinus wünschet/Ach HERR/hawe/
stich/schlahe vnd brenne hie/schone ja nur dorten.

Aber das ist eben das gebrandte Herkenleid /
das Gottes Hand vnd Zorn/wie in diesem Capitel ste-
het / nicht ablesset / sondern in die Helle hinunter stöß-
set / vnd ewiglich brennet / alle Gottlose vnd Vnbus-
fertigen. Denn darumb hat / spricht der Prophet / die
Helle die Seile weit auffgesperret / vnd den Rachen
weit auffgethan/on alle maß/ das herunter faren/beide
jre Herrliche/vnd Pöbel/Edel vnd Vnedele/ jre Rei-
chen vnd Frölichen/keinen ausgenommen.

Dieses ist zumal erschrecklich / denn in die Hel-
le fahren/ist nicht so ein schlecht vnd gering ding / wie
die Leichtfertigen zu reden pflegen / das es fein warm
drinne sey / vnd sey nicht so heis / wie man sie mache/
vnd sey jnen gleich viele / im Himmel oder in der Hellen
sein / denn wo sie hin komen / werden sie Gesellschafft
finden. Sondern die Helle heisst / Gottes ewigen
zorn/vnd Hellschen Brand / Matth. 25. Ewige vnz-
auffhörende schmerzen/angst/qual vnd pein / Rom. 2.
Die grewliche finstere Grube / da kein Wasser / erqui-
ckung/oder hoffnung einiger Erlösung sein wird / Za-
charie 9. Ein ewiger nagender Wurm des Gewis-
sens/ Esaie 66. Vnd das Reich Gottes vnd Christi /
nimmermehr in ewigkeit besitzen / Gal. 5. Ephe. 5. 1. Co-
rinth.

*Salva uisus
für für*

Amandus Seus
guch.

Einth. 6. Vnd in summa/wie die herrligkeit der Kin-
der Gottes/die an jenem Tage/an jnen wird offenbar
werden/keines Menschen Auge gesehen/kein Ohre ge-
höret hat/vnd in keines Menschen Herz gestiegen / al-
so sind die zukünfftigen schmerzen vnd pein / der Ver-
dampften in der Hellen/vnseglich vnd vnermesslich/wie
in dem Elenden JamerGesang der Verdampften in
der Helle zu hören/so Amandus Seus etwan geschrie-
ben hat / das sie nacht vnd tag / erbermlich heulen vnd
flagen. O jamer vnd not / O Helle vnd Tod / O
elend one ende / O sterben one sterben / alle stunde ster-
ben/vnd doch nimer sterben. O scheiden wie thust du so
wehe. O Hende schlagen / O grietzgram / seuffzen vnd
weinen / O jmer heulen vnd ruffen/vnd nimermehr er-
höret werden / vnser augen mögen nimermehr anders
sehen / denn angst vnd not / Vnsere Ohren nichts an-
ders hören/denn ach vnd weh. O jr Berge vnd Thal
was beitet jr / was halt jr vns so lang auff? Warumb
bedeckt jr vns nicht / fur dem jemerlichen vnd grawsa-
men anblick? O leiden/dieser vnd jener Welt / wie bi-
stu so vngleich? Ach vnd weh / das wir on allen Trost
vnd zutersicht müssen gescheiden sein. O Ewig/ wie bi-
stu so lang/ etc.

Das ist warlich zumal ein elend vnd erbermlich
geschrey/ so gewis erfolget vff die kurze / elende Welt-
freude / wollust vnd obermut der Gottlosen / on einige
hinderung vnd auffhören/dafür billich / allen vnbusfer-
tigen Weltkindern/sinn vnd mut fallen / vnd das Herz
im Leibe brechen solte.

Aber es gehet leider/wie die Propheten flagen/
Wer glaubet vnser Predigt/ vnd H. E. N. / wer achts/
das

Das du so sehr zürnest? Ja freilich wil niemand mehr
glauben / bis den Gottlosen der Glaube zu Haus vnd
Hoff/Leib vnd Seele kome/vnd sie Gottes Hand vnd
zorn / auff dem Siegbette / wirds anders noch so
gut/ mit zittern vnd zagen/ fülen müssen/vnd mit zetter
vnd weh zum Teuffel fahren / vnd schliessen / wie Virg
gilius des Tyrannen Turni leben beschleust:

Vitaq̄ cum gemitu fugit indignata sub vmbra.

SD gehet der vorige / trokige vnd hoffertige
sinn/ mit vnd Man / mit einander auff / mit grossen
weh vnd zagen.

D Jhesus solte ja trawen manchen geiskigen Seufz
fer/trokigen Schnarcher / vnd hoffertigen Berechter
Gottes / zur Busse vnd Bekerung treiben / der sonst
mit guten worten / nicht hat fond gewinnen werden /
vff das er dem ewigen jamer der Verdampften empflie
hen möchte. Zweiuel auch nicht/es werdens etliche zu
gemüte füren/vnd durch Gottes Gnade / ein ander Les
ben in Gottes furcht anfahen.

Das dritte stücke.

AS aber keine Busfertigen die Gottes
Gnade abgeschlagen werde / bezeuget der Pro
phet nu mit einem schönen Trost/ daran wir
vns alle halten sollen / vnd können / vnd dadurch wo
nicht fur dem zeitlichen wol verdienten vnglück /jedoch
fur dem ewigen verderben beware werden.

Der Herr Sebaoth / Spricht er / wird erhör
D iij het

het werden / im Recht / vnd Gott der Heilige wird geheis-
liget werden / in Gerechtigkeit: Das ist / er wird lassen /
vnd lest jmer für vnd für predigen / Buß vnd verge-
bung der Sünden / in seinem Namen / vnd das alle ge-
recht / vnd selig / auß lauter Gnade geschehen sollen werde /
alle die an jn glauben / seines Leidens vnd sterbens sich
tröste / das dadurch allein alle jre Sünde gereit gebüßet /
die Verdammnis / vnd Todt vffgehoben / der Teuffel
vberwunden / vnd gerichtet / vnd dargegen eine ewige
Erlösung erworben sei / wie geschrieben stehet: Wer
an den Son Gottes gleubet / der hat das ewige Leben.

Den das heist Gericht vnd Gerechtigkeit /
wenn Gott predigen lesset / das Er die Gottlosen zeit-
lich vnd ewiglich wolle straffen / wo sie nicht Busse
thun. Gerechtigkeit aber / allen Busfertigen vnd Glei-
bigen / das sie sollen ewigen Friede / vnd ewige Se-
ligkeit haben / vmb des willen / der jnen zur Gerechtig-
keit / zur Erlösung vnd Heiligung / von Gott gemacht
ist / I. Corinth. I.

Vnd das on alles ansehen der person / Jüden
vnd Heiden / Edle vnd vnedle / grosse / öffentliche vnd
Kleine / oder heimliche Sünder / so sie nur der Predigt
vnd Euangelio gehorchen / als einer Krafft Gottes / selig
zu machen alle die daran glauben / Rom. I.

Also fasts beides der Prophet auch droben im
3. Capitel sein zusamen / da er sagt: Prediget den Bez-
rechten / das sie es gut haben / den sie werden die Früch-
te jrer Werke essen / das ist / Es sol jnen gewis hie vnd
dort wol gehen. Widerumb sagt er / Aber weh auch den
Gottlos

Gottlosen / denn sie sind boshaffig / vnd es wird
inen vergolten werden / wie sie verdienen.

Das ist Gottes Gericht / welchs Christus publiciret / Johan. 3. da er sagt: Ein Gottloser / vngleubiger sey schon gerichtet / denn er gleubet nicht an den Namen Ihesu Christi / vnd der H E R R wird gewis kommen / vnd solchs Gericht vber sie exequiren / wenn er nu alle Vbelheter / mit allen Teuffeln / von sich abweisen wird / in die ewige Hellische Blut / Matth. 25. Die Gottfürchtigen aber vnd Gleubigen / in das ewige Reich Gottes seines Himlischen Vaters / leiten vnd auffnehmen.

Diesen herrlichen Trost / hat dieser verstorbenen Juncker Hans Stapel / auch gefasset vnd mit sich von hinnen genommen / Darumb er aus dem Gerichte Gottes gerissen / on zweuel bey dem H E R R N Christo ist / in ewiger ruhe / vnd gerechtigkeit / nach dem Spruch Apocalyp. 14. Selig sind die Todten / die in dem H E R R N entschlaffen.

Denn ob er wol / wie euch bewust / etwan wilde vnd wunderlich gewesen / seine gebrechen gehabt / vnd von dem Teuffel vnd der bösen Welt verführet worden / dennoch da im Gott / durch Beterliche züchtigung / ziemlich hart hat zugesprochen / das er Gottes zorn vnd straffe gefület / vnd erkennet / Hat er auch in aller demut / das Feuer in der Aschen gesucht / vnd mich Unwürdigen / den II. Decembris / zu sich fordern lassen / seine Sünde bekand / vmb Trost / die heilige Absolution / vnd Hochwürdiges Sacrament des Leibes vnd Blutes Ihesu Christi / gebeten.

Drauff

Drauff ich jm / wie mir meines Ampts hal-
ben nicht anders hat gebüren wollen / seine Sünde
ernstlich fürgehalten / Gottes zorn vnd fluch aus dem
Gesetz Gottes / vber sein wildes Leben vermeldet / auch
als bald die krafft des Hammers / damit Gott die Fel-
sen zerschmeisset / wie Jerem. 23. dauon redet / befün-
den. Denn fur schrecken vnd zagen / er mir mit seinem
Peccavi in die rede fiel / vnd mit lauter stim vnd gefalte-
nen Henden schribe: O HERR Gott / vergib mir
meine Sünde / Wie David vnd der arme Zölner auch
saget: O Gott / sey mir Sünder gnedig. Vnd
hat on zweifel / allererst damals gelernet / was Sünde
vnd Gottes zorn sey / Wie er sich auch ein mal hernach
cher mit kleglichen Worten hören liesse: Ach habe ich
dann die ganze Welt verfürnet / welche wort vff die
Donnerkeil Mosi / in seinem Gewissen erfolget sein.

Drumb er auch auff meine erinnerung beger-
te / die Kirchen allhier vnd Gemein / vnd einen jeden in
sonderheit / vmb Christliche verzeihung seiner Sünden
vnd gegebenen ergernissen zu bitten / wie denn gesche-
hen.

Drauff ich in mit dem Euangelio vnd Trost
wider ermunterte / absoluirete / vnd das heilige Sacra-
ment / des Leibes vnd Bluts Ihesu Christi / zur verge-
bung seiner Sünden / vnd sterckung seines Glaubens /
reichte / Er es auch mit freidiger begier / empfangen /
vnd vff meine weiter vermanung / zum Gottseligen les-
ben / da jm Gott wider würde auffhelffen / nach seinem
gnedigen willen / oder zu Christlicher gedult / in seiner
Kranckheit vnd woluerdienten Creutz / niemand mit
vngedültigen / zornigen geberden vnd reden / ergerlich
zu sein.

zu sein. Sagte er mir solchs nicht allein zu / mit hand
vnd mund / Sondern beweiset es auch also bald / als ein
newer Mensch vnd danckbarer Christ.

NB / sprach er / Gott lob vnd danck / vnd euch
lieber Herr / wolle der Allmechtige Gott vergelten / das
ir ist an mir gethan habt / Ich kans euch nimmermehr
vergeltten.

Also schickt er sich auch folgende tage sein
Christlich / vnd mit grosser gedult / in seinem schweren
Creuz / zum seligen abscheid / verziehe sich aller Weltli-
chen Hengel / vnd Güter / mit vieler verwunderung /
vnd ergab sich ganz vnd gar / in Gottes willen / mit
Leib vnd Seel / vff die gnedige verheissung Christi / so
ich im offte vorsagte / er mir auch nachsaget: Also hat
Gott die Welt geliebet / das er seinen Eingeborn Son
gab / auff das alle die an in gleuben / nicht verloren
werden / sondern das ewige Leben haben / Johannis 3.
Das glaube ich / darauff warte vnd hoffe ich / **HERR** /
du wirst mich nicht lassen zu schanden werden.

BEtet auch etliche mal mit vns das Vater vn-
ser / vnd diese folgende wort: Erbarm dich mein
HERR Ihesu Christe / vnd hilff mir aus dieser
Not. **HERR** / meine Seele befehle ich dir in
deine hende. **HERR** / in deiner gewalt lige ich /
dein bin ich / ich lebe oder sterbe. Zukome dein
Reich / vnd hilff mit gnaden hie hindurch. Kom
bald **HERR** Christe / vnd verlas mich nicht / wie
du mir gewis versprochen hast: Ich bin bey im
E in der

in der Not / ich wil in heraussere reissen / vnd zu Ehren machen.

Zem bald vor seinem ende: **H**err **J**hesu **C**hriste / du hast mich erlöset / du getrewer **G**ott / verlas mich nicht / denn ich hoffe auff dich. **A**ch **H**err / kom bald nach deinem willen / errette mich **H**err / denn die Todes angst ist nahe / eile mir zu helffen / vnd errette meine Seele. **H**ilff **H**err / las wol gelingen / wie du verheissen hast / Die auff den **H**errn hoffen / sollen nicht zu schanden werden / Amen.

Herauff ist er beruhet / vnd mit erinnerung solchs seines Trosts vnd Gebets / in starcker hoffnung / den **M**ittwoch / welcher war der 20. **D**ecembris / halbweg fünffe / nach **M**ittage / sein sanfft / on vngewerden / in dem **H**errn entschlaffen / seinen Namen / Geschlecht vnd **L**eben / **G**ottselig geschlossen / vnd also Schild vnd **H**elm zerschlagen / mit Ehren vnd **C**hristlichem **R**hum / mit sich in sein Grab genomen. **V**nd ist im also der liebe gecreuzigte **C**hristus / welchen / sampt einem **H**irsch / er vnd alle seine selige **V**orfaren / in irem Schild vnd **H**elm gefüret / dennoch auch / als einem verirreten **S**chesslin / zu hülff vnd **T**rost kommen / vnd in erquicket in seinen letzten nöten / wie ein **H**irsch in seiner flucht / mühe vnd arbeit / mit einem frischen **W**asser erquicket wird. **D**afür wir alle seints halben von **H**erzen **G**ott zu dancken haben.

Dieses haben sich nu die / so diese trawrigkeit betriffe

Betriffte zu freuen / das / ob gleich Gott diesen jren
Freund / gar wol gerollet / vnd als sein Kind ziemlich
hart gesteuppet / vnd durchs Creuz wol geprüfet / zum
Mitmerterer seines Sons Christi Jhesu gemacht hat /
das er doch im solchs zum besten gethan / vnd dargegen
in gereit zu sich auffgenommen hat / in die Herrligkeit
vnd ewiges Freuden Reich seines lieben Sons Christi
Jhesu. Den er hie erkant vnd bekant / an in gegleubet /
vnd seinen Glauben / in Christlicher gedult / bis an
sein ende bewiesen hat / Wie wir aus dem allen / was
wir von im gehöret vnd gesehen haben / nicht anders re-
den vnd richten können noch sollen.

Wir andern sollen aus solchem Exempel / Got-
tes grosse gedult / sanfftmüt vnd Barmhertzigkeit / ler-
nen erkennen / vnd wie so gar der frome Gott / nicht
wolle / das ein einiger Mensch verloren werde / Sons-
dern das sie alle zur Busse bekeret / vnd selig werden.

Den darumb ist diesem Barmhertzigkeit wi-
derfaren / wie auch Paulus I. Timoth. I. von sich selbs
redet / das andere auch zur Busse sich bekeren / vnd glau-
ben sollen / zum ewigen Leben.

Es wolle aber ja niemand solch tröstlich Gna-
den Exempel mißbrauchen / vnd dahin ziehen / als möge
er auff Gottes gnade sündigen / die Busse also lang
auffschieben / bis in Gott auch eins mal also demütiget /
vnd in des gedencen / Es sey zeit genug from zu wer-
den / wenn er sterben sol / vnd seine lust in der Welt erst
wol gebüffet habe.

E ij

Den

Denn es gehet nicht allen also an. Eine Schwabe macht keinen Lenz. Vnd ist Gott nicht schuldig / das er eben also mit dir auch / wie mit diesem / umbgehe / hat vns auch nicht befohlen zu forschen / warumb er mit besondern Personen also handelt: Sondern es möchte was erschrecklichers vnd ein schneller Tod dich vberreiten / vnd treffen / wenn du am sichersten / vollest / vnd hoffertigsten werest / vnd ewig verdammen vnd verderben / wie solche Exempel teglich vorkommen.

Darumb weil Gott ist noch predigen lesset / Gericht vnd Gerechtigkeit / durch sein heiliges Euangelium / vnd dadurch alle Menschen ansprechen / Thut Busse / denn das Reich Gottes nahet sich / So sehe ein jeder auff / das er sich finde zum Reich Gottes / vnd der ewigen Gerechtigkeit teilhaftig werde / ehe denn die Thüre im vorrent / vnd der weg zur Busse verlegt werde / Liebe niemand gefahr / das er nicht darinne umbkome. Sondern heute / heute / wenn jr meine Stimme höret / spricht Gott im 95. Psalm: So verstosset ewer Herzen nicht.

Denn ob wol Gott gerne alle Menschen wolte selig haben / vnd Ezech. 18. vnd 33. geschworen hat / das er kein gefallen habe an einigem Sünder tod / sondern das er lebe / So wil er doch auch / das sich der Sünder zu jm auch bekeren sol / wie Zacha. 1. Gott auch sagt: Bekeret euch zu mir / so wil ich mich zu euch bekeren / vnd das je ehe / je besser.

Werden wir zu lang verziehen / vnd die Befestigung von einem tag zum andern auffschieben / vnd dem
Jorn

zorn Gottes raum geben/ so wird er plötzlich kommen /
vnd wirds rechnen/vnd dich verderben/ Sirach 5.

Denn wie Gott Bekerung vnd Leben zusam-
men geschworen:: So war als ich lebe/ wil ich den tod
des Sünders nicht / Sondern das er sich bekere vnd
lebe. Also ist ein mal Gottes zorn vom Himmel/ vber als
le Unbusfertigen geoffenbaret / vnd dem wird keiner /
weder Gottloser noch Heuchler entlauffen. Sondern
sein Gottloses wesen vnd Heuchelei / wird viel mehr
als doppelte Sünde / mit doppelter straffe daheim ge-
sucht werden. Denn Gott ist ein rechter Richter/spricht
David im 7. Psalm: vnd ein Gott der teglich dretet/
Wird man sich nicht bekeren / so hat er sein Schwert
geweket/vnd seinen Bogen gespannt/vnd ziele / vnd
hat darauff gelegt tödliche Geschöß / Seine Pfeile hat
er zugericht zum verderben/etc.

Der Allmechtige vnd Barmherzige Gott / gebe
seinen Segen / das dieses Wort one frucht nicht abge-
he / Sondern wo nicht alle / doch etliche treffe vnd be-
kere / wie er zugesagt hat : Ewer arbeit sol nicht vergeb-
lich sein im HERRN. Item / Mein Wort sol nicht
wider leer zu mir komen / vnd sol jm gelingen. Das
wünsche ich allen vnd jeden von ganzem her-
zen/durch Christum vnsern HERRN/

A M E N.









Wh 87

(7.)

ULB Halle

3


001 548 603



TA → OL

IDA





29
Leichpredigt
Vnd dem Begrebnis des Gestrengen
vnd Ehrnuesten Junckern Hans Sta-
pels / Erbsessen zu Litow
seligen. w.

Geschehen zu Zerbst in S. Bar-
telmes Kirchen / Sonnabents / den
XXIII. Decembris /
Anno 1570.

Durch
M. Clementem Stresonem
Prediger daselbst.



Witteberg. Gedruckt durch
Lorentz Schwencck.

1571.

*Albertus Bingke
pauca scripserit
vni Anno suo
nisiimo. 14 Mart*